

欽定全唐文

欽定全唐文卷三百十三目錄

孫逖

六

贈太子詹事王公神道碑

太子右庶子王公神道碑

東都留守韋虛心神道碑

太子舍人王公墓誌銘

滄州刺史鄭公墓誌銘

宋州司馬先府君墓誌銘

太子少傅李公墓誌銘

欽定全唐文

卷三百十三

目錄

祭亡弟故左羽林軍兵曹參軍文

欽定全唐文卷三百十三

孫逖

六

贈太子詹事王公神道碑

洪範五福一曰壽三曰遁好德全生養形者爲壽而已非有德而不彰履仁蹈義者爲德而已非有後而不昌天生大賢神降元吉倚福祿而登祚允者在宿預公焉公諱同晊字某琅琊臨沂人也其先有太子晉以啟其初牒有將軍翦以固其元胄有中尉吉以大其儒門有丞相導以蕃其鄉族自導至公十有一代禮樂增業衣冠濟美天下之

人謂之著姓曾祖寬陳侍中祖誨之皇朝祕書郎父知無  
祿早世皆先達之良也公夙遭閔凶不稟嚴訓聖善所育  
孩提有成體恬淡之性資醇釀之德學無常主言不爲華  
踐行而隱其轍迹襲明而晦其光耀湛然以靜淵然以默  
故談者無得而名焉儀鳳調露之間太夫人春秋高矣願  
及親以筮仕豈要君而擇祿繇是解褐鄧州南陽丞六安  
不樂吾聞其語公則喜焉孝子之致養也秩滿授濟州司  
法參軍垂拱中冤獄起州將辭顛伏法以公坐是失職十  
有餘載十年不調人以爲難公卽坦然仁者之處約也久

之選授吉州司法參軍以丁內憂哀毀過於禮幾至不全喪服旣除哀心未盡遂不茹葷血於身矣神龍初調補司農寺主簿時從父弟同皎選尚公主拜駙馬都尉公以國親封宿預縣開國男食邑三百戶得而勿喜知來者之不可却也尋坐駙馬所累調建州司倉參軍失而無愠知去者之不可止也洎睿宗受命亾韋開釋授公申王府主簿尋又增秩朝散大夫於是乎見倚伏之回穴矣居歲餘制攝安州都督府司馬除太子舍人轉太子中舍人歷太子家令拜宗正少卿遷左庶子東封之歲表請歸閭制授亳

州刺史致仕凡官歷二紀將更五君險阻則遇屯和平則之泰康強則陳力羸老則向晦命非吾有委運推移身非吾有與時消息動斯可效靜斯可則古之至人謂是全德春秋八十有四開元十六年七月十二日遘疾終於京兆安興里之私第皇上以公春華秋實之稱著於兩宮故贈以太子詹事飾終之禮厚莫重焉有司以公天經地義之德冠乎百行故謚之曰孝易名之典善莫大焉公束帶於朝端然齊肅目不近視體無懈容其從官也常避右職其御下也務存大旨不矯舉以求是不憂務以近名所謂建

陵之長者也公雅好釋典尤邃禪門爰有別業使營精舍  
懸車之後隱几於茲不出戶庭彌入真寂斯所謂維摩之  
梵行也公身居顯位子至大官萬石集門伯禽拜後而能  
謙約自退忠儉有恆占田必先於窮僻卜宅不更於爽垲  
所謂公綽之不欲也公屬之內開魯館者二人六姻之中  
降虞嬪者再世而能進不求寵退不失親遠而不攜進而  
不逼斯所謂山甫之保身也詩曰瑟彼柞棫民所燎矣豈  
弟君子神所勞矣宜王公之受茲茀祿式是繁祉享高年  
以有終保令聞而已者也初公娶於安定皇甫氏卽太

子舍人德參之孫洛陽縣丞寡過之女溫惠成性徽柔作  
則降年不永先公卽冥安厝之日公爲郡掾雖班秩有等  
邱封尚卑而精靈所寧歲月滋久而公之克葬禮用上卿  
同於舊穴是廢王命祔於新塋未達神理卜夢通感子孫  
是依魂無不之合乃非古以開元十六年十月七日葬我  
季公於偃師縣首陽山之南原夫人舊塋之東禮也嗣子  
太子賓客邱懿文軌時清行動俗爲國大器作人元龜不  
有教忠孰興於嗣不有移孝孰榮其親豐石未琢行楸已  
拱敷求作者枉逮門人昇闕里之堂實難諭賦表太邱之

墓多媿題銘銘曰

決決淮水世祚王氏於穆孝公是爲瑞士勳合元化靜符  
眞理以道觀身以忠教子北睇邙阜南瞻洛川還依舊穴  
更表新阡從古之制非今則然峩峩雙壠松柏生烟

太子右庶子王公神道碑

昔萬石君建陵侯皆以訥言敏行前史稱爲長者然必式  
路馬未免於無文常盛賜劍且疑於任職大鈞所治粹美  
爲難秉純德而苞偉量吾見之王公矣公諱敬從字某京  
兆人也其本曰魏公子信陵君之後秦人滅魏其處者爲

王氏氏族之世著於關輔焉漢有河南尹尊啟鴻軌於前  
載周有尚書令羣建休勲於近代羣生明遠隋司金上士  
遠生壽隋州都七職主簿壽生詰皇朝同州河西縣令詰  
生慶皇朝冀州棗強主簿宰相世系表作蒲州長史武氏革命之後實  
秉楚龔之節杜門自絕沒齒邱園公棗強府君之次子也

元精之所稟和高行之所貽訓德義之所府聚文儒之所  
膏潤空其炳秀騰實蘭薰而玉振者也龔者大定中舉文  
擅詞場景雲歲辟茂才異等開元初徵文藻宏麗公三對  
策詔皆爲甲科明試必可高明益著爾其用之吏事則岐

州陳倉主簿京兆府武功縣尉長安縣尉能理煩也施之  
儒術則祕書省校書郎太常博士著作佐郎能辨惑也繇  
是三入華省再登禁闈歷尚書禮部司勲員外考功郎中  
給事中拜中書舍人是時也張曲江李晉公更踐中樞公  
與徐安貞韋陟孫逖繼揮宸翰每至密命先發詔書卽舍  
人草創之二相討論之王言式臧天監允洽訓誥之地斯  
焉得人逖於諸大夫無能爲役也居數歲命公御史中丞  
又改太子右庶子所以穆清彝憲翼亮元儲咸事正人疇  
與爲言若夫軍旅之事公能兼之故信安王禕張忠敬引

以咨度清白之業公能守之故源乾曜韋抗皆有襃

關人

之疾苦公能惠卹故宣撫江淮克諭中旨國之軌度公能

筆削故刊定格式允叶

闕二字

材於位詢於事若斯之飭備

也而能葆光用晦體道安貞言寡尤行無悶勇於爲善而

不好立名直以全誠而未嘗忤物括囊君子之德昭合至

人之心以此持身全身保性之術也以此刑國鎮俗安人

之具也而年不登於下壽位不極於宗公未之或知自昔

然矣春秋六十有二以開元二十八年五月二十八日終

於西京靜恭里之私第其年八月十八日葬於咸陽洪瀆

原禮也公兄曰易從故吏部侍郎弟曰擇從今京兆府士  
曹咸以文學齊名當代公始以對策高第則易從同科迨  
乎典校祕文而擇從亦作其後歷青瑣掌黃縑兄旣先登  
公能繼美萼跗之詠凡今莫如則難兄難弟之喻也公夫  
人宏農縣君楊氏一子曰寥左驍衛錄事參軍楊有敬姜  
之德寥有曾參之行號天哭晝寧戚過毀公克葬之日雷  
雨頓歇於通衢反虞之際靈芝或生於靈寢神明昭格姻  
族嗟稱此又孝妻孝子之誠感也兄弟妻子生榮死哀士  
則嬪儀盡在於是嗚呼昔人所重同官爲僚默而無述豈

爲心盡況承兄友之深託復感其孤之至言宿草之墓雖  
云絕哭他山之石可以題銘用標京兆之阡願比延陵之  
劍其辭曰

昔與兄友雙遊鳳池平生景行非我誰知政事文學唯所  
設施溫良恭儉不忘謙卑雅道無悔高年未極逝者如斯  
人焉取則墓門何有蒼蒼荆棘天道寧論空傳令德

東都留守韋虛心神道碑

夫作春秋者必見於行事論將帥者蓋知其爲人余爲郎  
時南皮公實掌小司馬之職接武官次亟聞話言故思其

人詢其事可知而見之矣公諱虛心字某京兆杜陵人也  
甄六氣之純粹協九疇之正直沈靜端慤仁慈隱厚忠之  
屬也清貞本於至公孝之終也毀瘠過於寧戚斯所以行  
成於內名揚於世者已越在童冠升於膠序介然獨立異  
於諸生國子博士范頤嘗與均禮考功員外郎李迴秀擢  
以高第及夫岐下參卿河東主吏能於細謀其長御史賈  
虛舟舉以勸中丞侯令德與從常辨習於學也如彼材諸  
位也若此欲無顯得乎明明天法廷尉攸序命公作大理  
司直大理丞以至於卿肅肅王度憲臺是式命公作侍御

史以至於中丞長人之官以視百姓命公作歛曹二州刺  
史荆潞揚三州長史以至於太原尹司會之府允釐庶績  
命公作倉部左司二員外戶部兵部右司三郎中左右丞  
兵部侍郎以至於工部尚書其餘掌吏部選採訪處置使  
東都留守皆大任也又能兼之清風暢於臺寺陰雨膏於  
郡國所居致理所去懷德德以處事事以度功功成而義  
不愆事正而名不悖故今之任職者祖南皮焉初景龍中  
西域羌胡或謀背誕天威逮捕吏議咸劉公理其獄旬時  
伏念以爲刑者所以明除害也誅其桀黠可以除害捨其

脅從可以明德繇是全活者千有餘人洎皇帝二十四年  
鑾駕還長安之月有坐殊死在繇繫者時迫季冬將寘嚴  
法公爲之請曰攸徂之慶方喜來蘇好生之德宜加在宥  
上可其奏咸許從流此則蘇公之繇獄釋之之聽理也曩  
者竇懷貞姦佞之尤欲行私惠劉幽求勲庸旣茂將復私  
讎各有愛憎公嘗按驗皆舉直以明枉不詭隨而曲從秉  
心惟一蹈尾無懼其後荆有大賈利合權門揚有貪吏婚  
連相國公亦旣條察先訐姦家或命出其罪給郵置於三  
舍或撻記其過啟刑書於五宅此卽山甫之不吐石奢之

無避也爾其富人興利導俗閑邪於壽春則引芍陂以溉  
田於廬江則縣舒城以止盜茭牧之地實生稻粱萑蒲之  
澤遂均廬井此卽信臣之方略少卿之理化也若乃擇賢  
親仁度材委政謂唐休璟盧從愿先達之宗也故輯寧關  
右嘗與偕行謂趙良器劉琯後來之選也故廉問淮潰舉  
以爲介此則藥武之從善趙宣之使闕一字疇若予工實

諧俞往上方倚相適會云亡享年七十以開元二十九年  
某月日遘疾薨於東都寧仁里之私第皇帝悼焉贈揚州  
大都督府印綬賙物一百五十匹米粟一百五十石賜謚

曰貞明年某月日葬貞公於京兆之高陽原祔先塋禮也  
昔者豕韋作伯扶陽仍相寘德於後莫之與京公曾祖叔  
謙事太宗爲考功郎中與兄叔諧季武同在郎署時人謂  
三列宿大父曰知人事高祖歷司庫員外郎贈職方郎中  
公烈考曰維事睿宗歷戶部郎中終於左庶子贈絳州刺  
史季弟曰虛舟事皇帝歷戶部司勲郎中今移左司唐興  
已來歷仕華省析薪齊美棠棣同升述職爲奉先在常僚  
爲克友人物之盛凡今莫儔先是庶子府君之爲戶部郎  
署天庭之內首種行柳公及令弟能業其官曾是封殖益

以蕃廡比行年而不朽將樹德之偕茲仙臺譽之棠歌勿翦君子有以知韋氏之昌阜未可量也貞公之軌度所及遠也有美如是可無述焉肆其孤有方增永世之業先人之志俾余論綴故作是銘曰

龍旂翼商勲績惟光祚允其昌簪紱斯皇東郊處守北里居方時清任大運促人凶貞公之德柔和諒直始終不忒存歿爲則高墳有平豐石有泐芳名可久永永無極

太子舍人王公墓誌銘

公諱無競字仲烈其先瑯琊人也因官遂居東萊自宋太

尉宏至棣州司馬侃十一世世濟其美不墮其名公卽棣  
州府君之次子也克廣前烈於昭令聞翩翻海瀨焜耀京  
國夫又用三德正直居首子有四教文行爲先公蔚其文  
高其行據於直歸於正生而知之實稟其性弱冠以應制  
擢第解褐授趙州藥城縣尉歷麟臺正字轉右衛倉曹洛  
陽縣尉監察御史殿中侍御史太子舍人神龍初坐以嘗  
詆權幸貶於嶺外終於廣州春秋五十四工文則學必從  
之故登麟臺侍龍樓也好直則威必濟之故吏京邑秉天  
憲也行高則眾必疵之故陷非罪謫殊方也噫良工能爲

順君子能爲道而不能爲容士師黜宣尼困屈原逐  
賈生憤公其近之矣初天冊中公與故人魏州牧獨孤莊  
書忿林胡之倡狂哀冀方之阨隍誠以軍志示之死所客  
有薦其書者則天見而異之有制召見驟膺寵渥相如之  
賦感人主未云速也迺者恩澤侯張昌宗位極大官寵震  
羣后公著書東觀與之聯事曾是貽籍未嘗曠就色莊見  
憚象恭益淡長孺之抗禮將軍曷足議也公嘗執簡中禁  
司察位班時三事大夫有族談錯立者公進而言曰朝有  
著定所以道威儀邦之具瞻所以昭軌物不道不恭不敬

不從其可是耶則肅然就列次矣公之舉劾大臣庸可異也嗚呼人各有能且又不朽公則具舉其誰與京公生於齊長於魏不忘吾黨常操土風嗣子某虔卜遠日奉成先志以開元十六年某月某日徙殯於館陶歸葬於東萊之舊塋書順也夫人范陽盧氏祔焉從周也窀穸之事可無記乎辭曰

萬靈秀百夫特萬卷精多才克詩可興筆餘力人之望邦之直何不仁俾大棘厄炎厲哀明德卜佳城於舊國銘景行永無極

滄州刺史鄭公墓誌銘

有唐之德讓君子曰原武男鄭公諱季本字某滎陽開封人也父曰荊州松滋令乾瓚松滋之父曰士志祕書祕書之父曰華州刺史襄城公諱某世有令德時稱華胄蕃衍六姻阜昌百祿非夫縉衣之慶羔裘之仁平惠之勲厲宣之親則孰能光宗保族若斯之盛也公秉彝中和服義先訓季惟不匱友則因心敦詩以言習禮以立用此道也行於國施於政善氣潛暢清風高翔何嚮不可所居則化矣始以明經高第解褐潤州參軍厥初奮庸克勤小物吏曹

以文敏於從事也故與之縣授泗州虹縣令魯人稱之璽  
書降焉衛人賴之碑頌立焉先大夫張文瓘人之望也典  
掌台衡督課郡國以公課爲第一且曰雖居下邑聲聞上  
繇天下長吏樂以爲式若占疑於龜筮如觀法於象魏矣  
特敕授蒲州虞鄉縣令理如故迹帝是用臧乃詔公爲隴  
右道廉察使疑有  
關堪其事也又爲本道使杜求仁特表薦  
以賢舉也制授朝散大夫雍州鄠縣令已而永淳大饑關  
輔尤甚能布其德而恤災人不離散下無捐瘠乃耕乃畝  
嗣歲以登時皇儲監國多公善政特賜考詞褒異睿文光

被列郡榮之改懷州司馬歷夏州長史以母老乞罷官優詔換瀛州長史東表不寧也命公爲平州刺史兼充使知營府支度營田刺郡實邊能成二事中土之作也命公爲洛陽令又轉洛州司馬理煩佐劇爲則四方尋以丁內艱去職藥藥骨立人倫傷慟旣練有制起復又除洛陽司馬公泣血固讓不獲已強拜禮從恩奪而瘠由哀甚忝君之命有以知奉上之心執親之喪有以見過人之戚臣子之道仁遠乎哉尋除貝州刺史轉安西都護以疾不堪詣部改授滄州刺史公自重拜洛師再臨河朔曾是遘閔常多

移病隱几而敬讓興行閉閣而姦邪消釋德敷於下貝邱  
多請禱之人功格於上滄海有卧理之詔老氏云鎮之以  
無名之樸其在是矣聖歷元年九月以致仕終於東郡之  
敦行里春秋六十有七凡束帶在位三十餘祀理京師訓  
郊甸惠華夏清朔漠九變復貫百度維貞其養人也寬而  
栗其行已也儉而一撫孤無隔於外姻博施不崇於內實  
蓋德行之具美而政事之首出壺遂溪中未登漢皇之相  
國僑遺愛遽感鄭人之泣公娶於王氏夫人曰瑯琊郡公  
正員外令思之孫司刑大夫允壽之女稟訓齊大作嬪韓

樂淑慎威儀循守典禮雖貴膺展狄而躬事組紩有雞鳴  
之賢有螽斯之盛自嬰晝哭遂契明因忘心昧禪悟理根  
善總斯純懿貽厥高門空錫難老何孤淨德以開元十八  
年五月終於東都懷仁里享年八十有四年正月某日  
合葬於某所從先塋也嗣子尚舍奉御暉之兵部郎中倩  
之洛陽令侃之皆保世之主也克荷三徙之訓俱登五命  
之服養極其樂喪盡乎哀閔騫之人無間言石建之門傳  
孝道復見之矣詩曰釐爾女士從以孫子原武有焉銘之

下泉表是真宅銘曰

闕

宋州司馬先府君墓誌銘

府君諱嘉之字某魏郡武水人也故屬安樂蓋齊大夫書之後至晉長秋卿道恭有子曰顥避地河朔後世居焉顥五世孫魏光祿大夫惠蔚爲本朝大儒自時厥後不墮其業公卽光祿元孫也曾祖孝敏隋大業中并州晉陽縣令所居之聚聊設衡關至稱爲晉陽里祖仲將皇朝鄆州壽張縣丞父希莊皇朝韓王府典籤自晉陽至府君四世而傳一子故五服之內無近屬焉府君四歲而孤無所怙恃外祖劉士傑因官居於潞之涉縣府君自幼及長外族焉

依克自激昂允迪前烈弱冠以文章著稱因此遊太原涉西河以觀陶唐之風河汾之間有盛名矣垂拱載初之際始詣洛陽獻書闕下極論時政言多抵忤所如不合遂投迹大學託名常調天冊中以進士擢第與崔日用蘇晉俱爲考功郎中李迥秀特所標賞久視初預拔萃與邵炅齊澣同昇甲科解褐蜀州新津縣主簿又補河南府緜氏縣尉改王屋縣主簿府君少好攝生之術自王屋受訣於司馬先生便欲罷官學道而官微祿薄曰衰門無儲宗黨孤眇無所仰給繇是願效六百石長吏焉歷洛州曲周宋州

襄邑二縣令秩滿之後遂絕迹人世屏居園林怡神太和  
以適初願居數歲適長子逖拜中書舍人實掌絲綸皇上  
以府君有義方之訓特授朝散大夫宋州司馬仍聽致仕  
手詔褒美親族榮之享年八十三以開元二十七年四月  
二十四日棄背於東都集賢里之私第府君性聰明而志  
高邈學該百氏而不爲章句文窮三變而尤工氣質早有  
大名晚從卑位於是知命之不偶道之不行隨時委運澹  
然無營而疇昔輩列平生雅故當軸處中者多矣蓋未嘗  
跬足而近之恬於勢利乃如此也然所莅之職必悉心爲

政不以小而易之人到於今遺愛矣爾其閨門之教子孫之謀猷之必遠誨則無倦萬石不假於謂讓太邱惟聞於善誘保乂於後無慚古人夫人廣平宋氏蒲州安邑縣令斌之孫滑州司士參軍郁之女淑德賢行淡慈至柔有子四人皆著名於詞學有女六人俱涉迹於圖史非獨府君之善訓亦有夫人之內則焉享年六十以開元十年十一月二十三日先棄背於河陽別業逖邁遘迨等遭天不憖遺降此鞠凶創鉅以深荼蓼又集永惟宅兆未立精靈未安猶力延療尚存餘喘卽以府君違世之年八月十二日

遷厝於印山陶村之西原合祔焉禮也北據岡阜南瞻城  
闕一以託州原之勝勢一以近庭闈之故居諸孤等亦願  
朝奠几筵幕掃松柏往來密邇以寘哀懷伏惟尊靈安此  
真宅小子痛極豈復能文泣血書事言多失緒其辭曰  
惟先府君不隕厥問克惟厥訓惟先夫人慈範是經柔德  
是程昊天罔極曷其報德敢述舊聞言豈爲飾

太子少傅李公墓誌銘

唐之宗盟有若武都公者諱嵩英華註云涼武昭王亦名嵩天寶間方追贈字某太原景皇之穆也淮安靖王之允也姓族本系存乎帝

籍王之子曰虢州刺史諱某

世系表云清河郡公靈州都督孝節虢州之子

曰鄭州

世系表云鄭州刺史瑜

生公世載明德實維邦翰昔我高祖

之造區夏也則淮安王擐甲胄誅暴強以佐經綸之業消

我皇帝之垂衣裳也則武都公秉衡石傳儲貳以宏邕熙

之化允武允文同心同德本枝百世不亦宜哉公應大賢

之期含正氣之秀弱而孤藐克自激揚六射五書包禮樂

之羣藝九流三變揆古今之至贊生八年而當天授革命

之事宗室懼禍至乃不全艱貞保身以免於難久視之後

密網少寬公以太夫人在堂無底祿之養願辱身以報德

豈養高而循名解褐授荊州枝江縣丞維此之故也爲賈  
尚幼辭宣有能淡爲州牧張漢陽所器重嘗謂所親曰唐  
宗一日千里吾見其人國未可量也神龍興復拜通事舍  
人其後歷尚書工部司勲員外屯田郎中太僕衛尉太常  
少卿汝汴二州刺史兵部黃門二侍郎太原尹太常卿  
工部尚書東都留守兵部吏部尚書太子少傅自枝江至  
於少傅凡十有九遷人臣寵秩備更之矣先是國朝舊制  
不以宗親任權開元以來內舉無避唯善所親擢拜右職  
公爲首也公體正心直色莊言厲明而可畏寬而能服故

所蒞之職必姦邪衰止禮義興行國人宜之有由然也曩  
膺列宿迨亞象河當官而行旣立名節及夫典汝瀆之國  
爲夏卿之貳天下歸最朝廷讓能寵光大來公望首出矣  
黃門政之樞也公執事舉直以替其否太原邦之扞也公  
滅私寬賦克壯其猷六官之長是爲人樞三命益恭遂掌  
邦理綜覈流品終始七年凡所作法皆成故事其賞能拔  
異寘彼周行者可勝記乎上難其人公是以久而淡煩職  
事累請歸閒留侯有疾猶傳太子尼父不憇終萎哲人以  
開元二十八年五月十日薨於位春秋五十有八壽不配

德皇慈震悼追贈益州大都督親親尊賢焉禮也其年十二月七日葬於河南縣九嶺山之南原惟公以文學政事之才贍祗庸孝友之德揚親有立身之顯何止能養執喪有過人之戚匪惟率禮公兄曰昇弟曰暉兄愛弟敬夫和妻柔閨門之間內外以正均養猶子不殊所生豈引而進之乃因心則至公爲居守也暉寢疾私第沈痼彌年公損膳絕葷消形瘁色及病革之際冒禁而歸終以爲職守管籥不敢久留喪次長號撫櫻雨泣還臺至性傷人酸感行路昇之喪公也哀亦如之死喪孔懷其在是矣所謂曾閔

生九宗之地邢茅爲萬石之門蓋本乎國風而爲世範者  
嗣子造等八人無改於道聿修厥德永爲罔極靡所宣懷  
以逖嘗參使臣之戒且爲冢卿屬久承詰言猥託銘誌文  
仲事君之教何日敢忘鮑叔知我之恩曷其能報徒竭心  
於所事終有恨於斯文其辭曰

高陽之族才子克生禮樂爲憲親賢是程六官尤重祈父  
天卿二柄皆執理均政平汲直多病留侯強起尚傅重明  
俄驚闐水泣盡遺愛感深知己銘德下泉庶通神理

祭亡弟故左羽林軍兵曹參軍文

余年有五爾實以生四十餘載而爲弟兄撫鬚並育接袵  
相成奈何棄予長隔幽明爾之德器寬仁溫厚天道何欺  
不假爾壽爾之緣飾文學政事天道何欺不假爾位未至  
中秩纔過強仕奄忽如斯嗟何及矣予兼右職爾位中司  
兩京爲別數稔於茲頃雖一見倏已三時會合常少悠悠  
我思近有東訊駕言西上顧日望期心存目想當乘疾置  
以戒徂兩方欲再馳豈圖常往鑿不及診藥不及嘗壯年  
殞命暴疾罹殃無一言以告訣有萬恨於冥茫長號永痛  
裂膈抽腸爾逢天威余限王事倉卒之辰急難靡寄遣奠

之日奔臨莫遂痛緒彌淡哀端益至今也來斯驟移時律  
目絕遺象心催虛室顧天倫之有戚若具體之喪一諒修  
短之同歸在先後而相恤撫遺孤而流動氣脇臆而內圯  
伊物情之共傷豈余心之忍此蓬也未立稷英華本作穆兮仍  
稚以吾視之何但猶子神本不滅爾則有知精爽如在知  
今心期同蔬永絕采藻空施銜酸沃醉哀不能支

欽定全唐文卷三百十四目錄

李華

一

含元殿賦

有序

哀節婦賦

有序

望灤泉賦

木蘭賦

并序

無疆頌八首

并序

平原公道德頌

并序

潤州丹陽縣復練塘頌

并序

欽定全唐文卷三百十四

李華

華字遐叔趙州贊皇人開元二十三年進士天寶中累轉侍御史禮吏二部員外郎祿山陷京師僞署爲鳳閣舍人賊平貶杭州司戶參軍上元中以左補闕司封員外郎召不拜李峴領選江南安置幕府擢檢校吏部員外郎大厯初卒

含元殿賦

有序

宮殿之賦論者以靈光爲宗然諸侯之遺事蓋務恢張飛

動而已自茲已降代有詞傑播於聲頌則無聞焉夫先王建都營室必相地形詢卜筮考以農隙工以子來虞人獻山林之幹太史占日月之吉雖班張左思角立前代未能備也而曩之文士賦長笛洞簫懷握之細則廣言山川之阻採伐之勤至於都邑宮室宏模廓度則略而不云其體病矣至若陰陽慘舒之變宜於壯麗棟宇繩墨之間鄰於政教豈前修不逮將俟聖德而啟臣心輒極思慮作含元殿賦陋百王之制度出羣子之胷臆非敢厚自夸耀以希名譽欲使後之觀者知聖代有頌德之臣焉其辭曰

維皇高祖穆端命於元穹萬有千載鍾景祚於鴻裔逮北  
宮之尊嚴上取法於天帝乃圖正殿之廸居規崇山而定  
制信神明幽贊而人謀襲契不然何前王曠此之雄麗也  
先是大司空帥其屬執度而相之曰美哉川原騖乎其大  
亘坤靈兮配乾剛坤順乾而爲龍舒廣衍兮走羣山紛卻  
面而朝宗陵正陽之奕奕鬱佳氣之葱葱蓋昊天之作而  
皇祇授元聖獲以造新宮也乃審於龜筮龜筮叶從太卜  
以告神人咸同皇曰欽哉是將宜於朕躬因以鴻稱含元  
建名易乾坤之說曰含宏光大又曰元亨利貞括萬象以

爲尊特巍巍乎上京則命徵般石之匠下荆揚之材操斧  
執斤者萬人涉磧礧而登崔嵬擇一幹於千木規大壯於  
喬枚聲坎坎於青雲若神蹕而顛摧勢動連崖拉風碎雷  
倒勁梢於窮谷斬巨柢於昭回時也山祗效靈波神作氣  
爲桴爲楫羽疊鱗萃朝泛江漢夕出河渭雲奔山橫交積  
於作宮之地於是農事旣收靈臺勿亟子來而就役者周  
邦畿而薄四海咸忘勞而獻力乃張爲廣度考正極星邦  
伯是經國工研精剗盤岡以爲址太階積而三重因博厚  
而順高明築陵天之四墉四墉旣列太階如截下土相嵌

愕視沈沈其始也星鉉電交於萬堵霜鋸冰解於千尋擁  
材爲山攢杵如林乃占日月之吉以成帝室虹梁動於中  
極棖桷戢以碧密析姑蘇以爲楹隱喬山以爲礎飛重檐  
以切霞炯素壁以留日神標峻楠鬼壘層楣高卑迭拒尋  
尺相持木從繩而後正棟操宇而不危階瑩冰級瓦敷鱗  
差蕩晶景而升降歛暎賜以交輝聳大厦之奇傑勢將頓  
而復飛爰詔有司練日推時徵考室於周頌會公卿以落  
之不赫哉如俯如跂若合若離竦森修邃以宵微悅業駁  
而巖巍謂衝飈激海兮漩齋淪以無底奔雷觸山兮掉巘

粵而傾斂石蛟拖首於堂廡狀出雲而撐髻崇高之制靈  
邱上盤鄰斗極之光耀邇天漢之波瀾察鑿枘之吞吐吸  
山叢而水攢建升龍之大旆邈不至於階端崢嶸辱顏下  
視南山照燭無間七耀迴環歛欲赫以突兀攢閼宏以蕭  
撮捧帝座於三辰銜天街之九達進而仰之騫龍首而張  
鳳翼退而瞻之岌樹顛而峩雲末嶷兮峩峩巨鼈戴仙山  
而出滄波劃兮煌煌燭龍折穹穴而臨北方排層城而廓  
帝居豁闔闔而面蒼蒼左翔鸞而右棲鳳翹兩闕而爲翼  
環阿閣以周墀象龍行之曲直夾雙壺之鴻洞啟重闔之

呀詭趨堂塗而未半望宸居而累息惟上聖之欽明爰聽  
政而布德去雕幾與金玉紩漢京之文飾熾丹牋於峻嶒  
抗重霄而競色若乃紫微晨曠形墀夜明雲薄萬栱風交  
四榮冬止其陽則釋裘而燠夏休其陰則捐綺以清旂獮  
風而振響葉墜露而成聲懸櫨駢湊竦柱奔列複檻晉綴  
高牕景爇黔日翳而眾連曜天開而中絕形持神而欲離  
足僂步而將跌貯昭訓之崇崇瞵光範之揭揭其南則丹  
鳳啟塗遐矚荆吳十扇開閉陰陽睢盱容鼎九局方駕五  
車示王者之無外不樹屏於清都望仙闕於翼維建福敞

於坤隅偃朱旗而橐元甲屯仡仡之驍夫其後則淡闡祕  
殿曼宇疎楹瑞木交陰元墀砥平鮮風歷廡凌霰飄英蔭  
藹武闈增華穆清玉燭內融則嘉盛豐備太陽臨照而天  
下文明古有六寢御茲一人今也三朝繇古是因布大命  
於宣政澹元心於紫宸義和弭節於通乾望舒停景於觀  
象密勿旒宸臣人是仰左黃閣而右紫微命伊皋以爲長  
其下則鶻冠魚服良家茂族厲禁非宜金吾領之其前則  
置兩石以恤刑張三侯以興武告善之旌登聞之鼓節晷  
漏於鍾律架危樓之筭簾以辨內外之差以正東西之序

天光流於紫庭倒景入於朱戶騰祥雲之郁靄映旭日之葱龍清渠導於元氣玉樹生於景風夷坦數里徘徊無窮羅千乘與萬騎曾不得半乎其中厥初經營天下既以文物未周孤其壯麗蓋重於施勞非不懷也乃眷睿孫睿孫開元萬物晏清而太和掩書契之所論旣克廣於崇構聲明備而益尊蓋聖皇之孝也揮綽變化兮動搖乾坤其東於是宏文教而開館對日華之清闕蓋左學之遺制協前王之講德其西於是延載筆之良史俯月華之峻扉集賢人於別殿朝命婦於中闈王風闡而成化陰教備而不虧

加以咏周詩而展親睦魯衛而敦敘因合族之來宴置更衣之豐宇至於殿內諸曹則左右有局通軒並廡物有恆司供無廢舉又有銀璫珥貂寺人巷伯奉宣出納之令更踐宮中之役熊羆之旅董以龍武矛戟森森材官羽林聲破邱山氣讐飛沈爪抉千鈞跟騰百尋克壯皇威協比其心其外則校人掌馬天駟在閑以備順遊放牧其間望我鑾和陟彼高山猶慮憲章或遺國容未備乃立掌匱之司館通事之吏職在達下情於上天倣王言於有位堙通大極墮指龍池重門內注複道潛移幽峻肅以相屬光彩融

以嬉嬉元象著明帝座維三皇居設位俯察仰參翼室正  
中遊宮次南北起含元其容耽耽總而言之如山之壽則  
曰蓬萊如日之昇則曰大明自茲而北燕遊所經達於苑  
囿不可殫名周廬更呵匝以環衛南端百仞上極霄際御  
視翫峯經塗廣深繚以層城默爲重陰至若時雨膏田九  
農懷暢暢雲歸山穴儻以昭曠白日麗於宮隅混晶光而益  
壯於是風師斂威纖燼不升穎絕搖落葉無翻稜自中徂  
外鏡洗川澄弦直閭閻井畫溝塍靡迤泰山陂陀漢陵知  
稼穡之艱難見皇王之廢興及乎元冥戒寒海神飛雪瑤

城粉野琪樹森列玉宇璇階雲門露闕天華爽霽朗日朝  
徹赤旗降庭朱柱艷月仰白帝而金精開據河宮而銀燭  
發其或靈夷不至帝用興戎降元帥於天上發神謀於禁  
中皇靈震燿殄厥渠凶矯矯武臣此焉獻功操俘虜而陳  
器械恢莫大之威容爾乃時殷仲冬日正南至上公奉斝  
羣后在位一人壽昌萬國承賜式燕以樂欣欣且醉乃撞  
宮懸硃碣天地及乎獻歲元辰東風發春懸法象魏與人  
惟新儼文物於王庭兼九伐而宿陳威儀之嚴嶽嶽振振  
若太一披絪緼而俯百神旣而咸造勿襄會朝清明璿柄

指寅寢闈發局皇帝御袞龍之法服佩蒼璧之純精執鎮圭導朱絃降輦登階微聞玉聲於是典禮之官贊王就位南面穆然至若甸侯采衛要荒閩貊輸其方費因不來格統以千官六卿二伯司儀敘進象胥重譯肅肅委皮乾乾奠璧設以庭燎天烘地赫雷鼓殷殷朱干玉戚神龔如生熊羆聘敵危昂歇向歛爛散射金根玉輅太常少伯火列門旂霜交陛戟乃進元元以觀禮從億兆之增增金吾南首麾之以肱遞攀援而聳仰齊屢企而冠騰太史來告卿雲勃興灑豐澤於生人答上元之休徵申命司寇緩刑冢

卿降德秩山川而問耆老周雨露而均邦國華戎竭歡喜  
氣闢塞揭金雞於太清炫晨光於正色慶忭之聲不踰辰  
而雷四域當斯時也驅周驥漢於廓煥爛王臨於朝天地  
貞觀靈宮巖巖上下交贊蓋所以法乾道而遵帝度豈惟  
安體而明威者哉夫瑤臺之美不可以刑萬國土階之陋  
不可以儀天下奢不遜而儉固允執中於大位洪範曰皇  
建其有極富哉上聖之宏議也詩歌楚室頌美泮宮諸侯  
之事也雲夢甘泉宴恢景福僻王之志也論諸侯曷若戴  
天子嘉僻王曷若尊聖人烈烈盛唐祖武宗文五帝報德

六王慙歎而政本乎慈用過乎儉夫蒼生所奉者惟君所  
愛者惟親寧有君親宅體於卑室而臣子得安其身乎故  
有熊明庭帝姚總期從人欲也天垂定星易有大壯君人  
法焉聖朝猶斥其華而憑其質今是殿也者惟鐵石丹素  
無加飾焉身居元眇心與萬姓同畎畝之勞以是臨眾何  
眾不賓以是享神何神不若其天德歟雖欲宮崑崙而館  
不周城八極而隍四海猶未足儲鴻醇而俯不耀豈咸鎬  
一京之所以崇四瀆之前式敕懷鉛之小臣俾讎書於禁  
中正百代之遺文由是循環天造耳目日新敢頌成功告

於神宗無媿斯干之什式昭聖德之容頌曰帝作含元含  
元言言萃若日觀呀爲天門太階三層遠法崑崙鎮茲秦  
野揭以周原烈文祖宗永錫孝孫季孫有慶於以施令奄  
甸萬姓受天休命歌之頌之管磬宜之穆穆皇君壽考無  
期既成斯文客有勸之上者對曰前王之尤祥絕瑞乃聖  
朝之細事今休徵已厭於聰明頌聲亦飫於天意私歌竊  
抃乃臣子之常志又焉足以薦聞哉客曰不然今至尊明  
發不寐有懷先皇周文之孝也允恭克讓光溢海外堯帝  
之謙也自卽位已來上下之休嘉臣人之詠歌歌於睿躬

則固辭頌於宗廟則無數今吾子之文明昭乎累聖之耿  
光美於大君之孝德可進而退宜言而默使雅頌之音卷  
而不舒猶坦蕩其胷臆無乃過歟爲人之下者有可違乎  
君親雖濱於死亦冒行之況宗廟啟其心哉臣華嘗聞遷  
善之規願附升歌之末

哀節婦賦

有序

武康尉薄自牧嘗謂余曰僕有賢女適江陰尉鄒待徵徵  
亦良士僕志之矣鄒子孤立時無古人誰復知之余嘗記  
其言及江左之亂待徵解印竄匿其妻爲盜所驅將辱之

妻密以待徵官告託付村媼尋待徵付焉而后就死嗚呼  
自喪亂以來士女以貞烈殆斃者眾余不盡知之若薄氏  
者與其父遊聞其聲義動於江南又焉得不賦之命曰哀  
節婦賦云爾

昔歲羣盜並起橫行海浙江陰萬戶化爲凝血無蘭不焚  
無玉不折峩峩薄媛淵然明節自牧之子待徵之妻玉德  
蘭姿女之英兮鄒也避禍伏於榛莽婉如之嬪執爲囚虜  
匍匐泥沙極望無覩出授官之告託垂白之姥姥感夫人  
爰達鄒君兵解求尸宛在江瀆哀風起爲連波病氣結爲

孤雲鳬鴈爲之哀鳴日月爲之蒙昏端衷移景而恆直勁  
芳貫霜而獨存知子莫若父誠哉長者言

望瀑泉賦

曙無雲兮川無波泛余舟於空碧彼廬山浮重湖之上兮  
峩極天之峻壁凝黛色之淡明噫林嶺之岑寂何神造之  
杳冥躍騰泉於山脊孤流皎皎於蒼梁翠淙千仞兮懸帛  
玉繩縋於寥天銀河垂於廣澤春風雷兮箇霜雪穿重雲  
而下射白龍倒飲於平湖若天地之初闢委滔滔兮東迤  
詎知夫維今之在昔倚高帆而一望豁余心兮灑滌近古

有鴈門上德兮昭洗塵昏柴桑閑士兮舍印推尊靈境殊  
象詮微究原人已古兮山在泉無心兮道存將默貫於精  
極欲置之而不言

木蘭賦

并序

華容石門山有木蘭樹鄉人不識伐以爲薪餘一本方操  
柯未下縣令李韶行春見之息馬其陰喟然嘆曰功列桐  
君之書名載騷人之詞生於遐深委於薪燎天地之產珍  
物將焉用之爰戒虞衡禁其翦伐按本草木蘭似桂而香  
去風熱明耳目在木部上篇乃採研以歸理疾多驗由是

遠近從而採之榦剖枝分殆枯槁矣士之生世出處語默  
難乎哉韶余之從子也嘗爲余言感而爲賦云

沂長江以遐覽愛楚山之寂寥山有嘉樹兮名木蘭鬱森  
森以苕苕當聖政之文明降元和於九霄更浸滲之爲虐  
貫霜雪而不凋白波潤其根柢元雪暢其枝條沐春雨之  
濯濯鳴秋風以蕭蕭素膚紫肌綠葉絅帶疎密聳附高卑  
蔭蔽華如霜雪實若星麗節勁松竹香濃蘭桂厭雜植於  
人間聊獨立於天際徒翳薈兮爲鄰挺堅芳兮此身嘉名  
列於道書墜露飲乎騷人至若靈山霧歇藹藹林樾當楚

澤之晨霞映洞庭之夜月發聰明於視聽洗煩濁於心骨  
韻眾壑之空峒澹微雲之滅沒露草白兮山淒淒鶴旣唳  
兮猿復啼宵深林以冥冥覆百仞之元谿彼逸人兮有所  
思戀芳陰兮步遲遲悵幽獨兮人莫知懷馨香兮將爲誰  
惋樵父之無惠混眾木而皆盡指羣類而揮斤遇仁人之  
不忍方甘心而剽絕俄固柢於傾殞憐春華而舉芳顧落  
日而迴軫達者有言巧勞智憂養命蠲疾人胡不求肢殘  
體剝澤盡枯留顚頷空山離披素秋鳥避弋而高翔魚畏  
網而深遊不材則終其天年能鳴則免於俎羞奚此木之

不終獨隱見而懼憂自昔淪芳於朝市墜實於林邱徒鬱  
咽而無聲可勝言而計籌者哉吾聞曰人助者信神聽者  
直則臧倉諳言宣尼失職出處語默與時消息則子雲投  
閣方回受殛故知天地無心死生同域紜紜品物物有其  
極至人者委性循於自然寧任夫智之與力也雖賢愚各  
全其好惡草木不夭其生植已而已而繫蔽不可得

無疆頌八首

并序

臣華言伏以漢明帝時徼外蠻夷槃木白狼獻詩歌德屬  
事史官況臣自曾祖至臣備國家職員臣又逮事元宗肅

宗今以餘年獲事陛下官歷御史補闕尚書卽命薄多病不獲奔赴闕庭恐先朝露同於泥塵若無歌詩頌德曾蠻夷不若也敢述列聖爲無疆頌式昭皇家大慶無窮謹昧死稽首以聞

高祖元頌一

昊昊旻天監於下甸興有德行維隋之杪時黓陰凝陽潛未登人思炤矣雷行龍興盪濯霧慝文明乎萬國垂仁烝人載親天監保我子孫巍巍皇皇後之皇丕承之

太宗烈頌二

高祖受天命誕興太宗承天之命帝煬昏逾黎人毒痛甚  
爇於鑪甚溺於塗以號以呼呼天無辜高祖謂太宗爾必  
有天下爾其訏謨太宗稽首恭受天命臣請滌除張我師  
撫征四國翦雍羣慝鼓一方三方振驚默炤其靈隨顧而  
平我負我乳我安我成以奉君父以臨天下任忠孝文武  
建禮章樂舞我雖明德諫則納汝時維帝降祐之自古明  
后莫如我德我勛唐無疆天子之無疆本太宗成命

高宗康頌三

肇爲阤爲堂實勤實勤付俾厥裔丕承后帝帝思不怠神

棐靜康不曜而光不求而昌自中方外達於夷羌瞻我大  
邦助祭於廟執貢朝於王油油時雲雨厥百穀漻漻景風  
扇彼嘉穀飴口飽腹以厭以足俾壽而福都阜成天人

中宗興頌四

屏薰之毒釁而爲蝮謀虐天之族天祐聖祚八柱將覆帝  
告五臣保翼朕躬赫赫形形日昇雲中五臣受命鍼爾頑  
凶故曰再造我天下生人鼓舞旣成矣又奉父母

睿宗德頌五

后戚之禍再興有危競競廟祧震怒陰命聖子翼登聖父

奮其神旅宵仗金斧金斧一斷殄殲逆亂大聖照臨元元  
宅心歸祚於有功有德於戲盛德

元宗文頌六

丕鑠元宗之明克孝克仁允武允文宣祖宗之光垂於子  
孫盛禮畢舉大樂畢陳百蠻來賓元元阜殷戎或不賓遣  
師徂征罔不頓穎踣於雷霆在漢方昌用刑慘酷中都繫  
考六萬餘人使者按錄誅千萬人然後興王光武赫赫誅  
沛賓客以千以百孝明稱賢楚獄連年坐死逮捕以萬以  
千猶曰漢祚寃長越我宗祖不忍用刑至於元宗哀彼鉄

鑽降爲鞭撻誕告郡國大爲屋室鑿彼百疾追懷登遐止  
害禽畜旁爲陂池養鱗介族旣濡旣渥昆蟲草木享國五  
十年寓縣晏然逆臣犯天天念蒸人若曰寧我負恥不忍  
人戰死乃告元子理兵朔鄙西幸蜀都命元子受圖天下  
旣定父堯子舜歸於國都無不忻愉無不涕濡傳聖自頤  
升靈太微嗚呼上聖之道之純不可度思

肅宗孝頌七

穆穆孝慈有如肅宗之誠達於神祇爰訓六師震發北陲  
陵陵雷馳西戎南蠻北狄東夷咸舉其旂佐皇之威帝心

天和無筮無卜。齕然邱岳破裂冰谷逆隸傾覆朝社大復  
屆於海之外。服以盥以濯以舞以躍。帝在東宮孝如文王。  
蒸蒸其心天地知其孝。旣收鎬洛祀於陵廟奉迎上聖天  
日普照有凶有孽將噬將齧我旂方設則已顛蹶如燭於  
雪尊嚴而仁仁覆而嚴大臣小臣莫不潔廉躬勤百度百  
度如其素。

今上昭頌八

大邦之興維天相之曷興曷相則有德繼王昔殷王盤庚  
武丁紹登殷明矧我帝唐不承天命疊引其慶生我皇聖

幼冲聖敬實左右肅宗開國御戎羣帥稟教舉則成功自  
西自東如霆如風蕩滌頑凶罔不率從既登天位於變時  
邕人咸曰上如太宗延億兆斯年延億兆斯年天博地崇  
罔不爾容元宗元孫象元宗列文肅宗元子承肅宗孝理

平原公遺德頌

并序

維上帝降靈爲賢弼我大邦鈞明說望協期陳謨仗鉞出  
師不赫厥勛大君以距嶺緣湖八州之域天下震擾此邦  
全寧內輔宗師外飭軍旅咽頤荆越鍾以眷右乃命平原  
賓護東宮而尊大之師長邦憲肅清華夷朱旂暢轂平原

戾止秋霜伊何視我直方春雨伊何宏我愷悌公張氏諱  
鎬字從周河內儒家時賢薦讓詔書徵起三年之間位登  
將相吉甫方叔平原兼之間歲臨海狂頑覆浙左陷上饒  
瀟皖寇徒殘害長吏潛逼鍾陵空春盜帥家兵遍山吏不  
敢問人愁苦之公默麾偏師勿駭吾人無聲無色羣凶梟  
夷下遂其順上遂其仁咸曰不有平原遑恤吾身平原之  
政以類而舉是邦胡寃公薨於鎮八州文武吏人老幼途  
哭家祭不能舉首夫山傾川竭未爲成災大臣盛德捨榮  
卽哀災之大者刻頌之義發乎心播乎聲施事爲教感哀

爲德公故吏侍御史博陵崔貴文明殿中侍御史昌黎韓  
洄幼淡監察御史趙郡李惟岳謨道大理寺丞王士華子  
秀尚書刑部員外郎前袁州刺史張澹惟清袁州別駕吳  
郡陸調牧臣及耆壽袁維清彭正運施希廷李開雲百姓  
彭伋潘玉等一十二人咨余爲頌撫石而泣故其詞也哀  
皇矣明王求公於野官在諫省將鋤悖凶謂公有勛庸授  
公肅宗納爲輔翼專征獵戎或蹇或通易簡昭融帝命平  
原八州隄封淡湖大江宣布睿德淳此下國蕩除妖賊安  
其父子爰及家室時萬時億山川出雲生此元臣獻歲發

春三靈化醇今則逝矣南方愁辛嗚呼平原如其仁如其仁

潤州丹陽縣復練塘頌

并序

大蜡之祭辭曰土反其宅水歸其壑先王因流下而導之故曰九川滌源因迤匯而瀦之故曰九澤旣陂以疏天地之氣以利元元之用崇伯汨五行而殛羽山臺駘障大澤而封汾川洪範首之春秋載之地有廣狹事無今古大江具區惟潤州其數曰練湖幅員四十里菰蒲菱芡之多龜魚鱉蜃之生厭飫江淮膏潤數州其傍大族強家泄流爲

田專利上腴畝收倍鍾富劇淫衍自丹陽延陵金壇環地三百里數合五萬室旱則懸耜水則具舟人罹其害九十餘祀凡經上司紛紛與奪八十一斷嗚呼曲能掩直强者以得之老幼怨痛沈聲無告永泰元年王師大翦西戎西戎旣駢矣生人舒息詔公卿選賢良先除二千石以江南經用所資首任能者是歲十一月二十三日拜常州刺史京兆韋公損爲潤州聲如飈馳先詔而至吏人畏伏男女相賀卽日上無貪刻下無冤憤公素知截湖開壤災甚螟螢臨事風生指期以復羣謗雷動山鎮恬然中明獨裁文

之以禮乃白本道觀察使兼御史中丞韋公元甫中丞撫  
手愜心如公之謀且曰興利除害得其人而後行非常之  
政敢歸叔父公乃申戒縣吏卒徒闢之人不俟召呼抑從  
役畚鍤蓋野浚阜成溪增理故塘繚而合之廣湖爲八十  
里象月之規儔金之固水復其所如鯨嘸射洶洶隱地雷  
聞泉中先程三日若海之彌望瀨瀨如吞吐日月沈沈如  
韁蓄風雨所潤者遠原隰皆春耕者飽憂者泰於是疏爲  
斗門既殺其溢又支其澤沃壻均品河渠通流商悅奠價  
人勇輸賦遐邇受利豈惟此州每歲萌陰乘陽二氣相薄

大雨時行羣潦奔流水得所入盈而無傷龍見方雩稼蒙  
其渥時前相國彭城公劉尚書晏統東方諸侯平其貢稅  
聞而悅之白三事以聞詔書褒異焉彭城公宣命至江南  
捧詔授公公率元僚掾吏令丞以下至於耆艾西向拜手  
忻戴皇明人心上感天降嘉澤如有神祇昭協厥志公正  
直而和專靜而斷嫉惡宥過惠人察姦純鈞精堅百鍊不  
耗伐冰之貴降從士禮詩云靖恭爾位好是正直宜其享  
多福也吏人入賀公拱而謝之曰尚書劉公觀察韋公奉  
行王澤也鄙何力之有焉丹陽令杜孟寅秉公之清白延

陵令李令從如公之愛人金壇令胡玘稟公之成規及丹  
陽耆壽周孝瓊百姓湯源等拜手而請曰允爲澤允悅也  
水歸於澤而澤悅於人百年侵塞而公啟之臣哉隣哉克  
諧帝休永代是式三縣無災若不碣而刻之則命不揚於  
厥後後之人無以倚負也華嘗學古見訪爲頌曰

望沄沄兮視冥冥鳥閒魚樂葭菼生膏腴利倍起訟爭斯  
人怨抑痛無聲韋公正直動神靈百年淤淀爲濛清饑者  
餓兮病者寧詔書光寵恩濡榮劃然眊矂復皎明追琢刻  
頌颺芳馨